

四明叢書

張宗祥



00
2
10

文莊夏子喬竦

見下文莊門人

崔氏門人

文正范希文先生仲淹

詳下睢陽所傳

謝氏家學

謝先生絳

別見廬陵學案補遺

文氏門人

凌先生策

凌策字子奇涇縣人登呂蒙正榜進士官至樞密副使
遷吏部侍郎兼知諫院事先生學博而敏超絕一世真

宗嘗言其治蜀敏而有斷王文正旦對曰策性質淳和

臨事強濟帝深然之

姓譜

雲濠謹案一統志言先生幼孤厲志好學會與姚鉉同學於廬州蓋師文先生道南云

唐氏門人

文正范希文先生仲淹

詳下睢陽所傳

睢陽所傳

補文正范希文先生仲淹

雲濠謹案先生封汝南公後追封楚國公國朝康熙五十四年從祀

梓材謹案曾氏隆平集於杜祁公傳云范仲淹嘗出彼門下後數爭事上前衍無愠色仲淹益敬服

焉蓋祁公固文正受知師卽以文正爲杜氏講友可也
梓材又案師友錄本先生年譜言其師事戚同文
攷同文次子綸太平興國八年進士後六年爲端
拱二年而先生始生必非親受學於同文也
雲濠謹案趙松雪爲義學記云宋時天下有四書
院應天府書院爲首先是郡人戚同文聚徒講授
士不遠千里而至文正公亦依之以學云云是卽
史傳所本然文正與睢陽不同時但謂其學之所
出則可耳又案先生與唐處士書云皇宋文明之
運宜建大雅東宮故諭德崔公其人某嘗遊於門
下云云又爲唐異詩序云高平范仲淹師其絃歌
嘗貽之書曰崔公旣歿琴不在
茲乎是先生並及崔唐之門矣

文正文集

性本忠孝者上也行忠孝者次也假忠孝而求名者又

次也至若簡賢附勢反道敗德不復愛其名者下也人不愛名則雖有刑法不可止其惡也

近名論

天微四德天道不行地微四德坤儀不寧人微四德則無令名惟聖人體乾而行後之希聖者處必親仁元之基也動能俟時亨之始也進思濟物利之方也守誠不回貞之道也周旋進退不離四者之中則其庶幾乎德

說

夫育材之方莫先勸學勸學之道莫尚宗經宗經則道大道大則才大才大則功大蓋聖人法度之言存乎書

安危之幾存乎易得失之鑒存乎詩是非之辨存乎春秋天下之制存乎禮萬物之情存乎樂故俊哲之人入乎六經則能服法度之言察安危之幾陳得失之鑒析是非之辨明天下之制盡萬物之情使斯人之徒輔成王道復何求哉

上時相議制舉書

夫子刪書斷自唐虞已下今之存者五十九篇惟堯舜二篇爲典謂二帝之道可爲百代常行之則其次夏商之書則有訓誥誓命之文皆隨事名篇無復爲典以其或非帝道則未足爲百代常行之典乃知聖人筆削之

際優劣存焉如詩有國風雅頌之別也

與歐靜書

青春何苦多病豈不以攝生爲意門戶才起立宗族未受賜有文學稱亦未爲國家用豈肯徇常人之情輕其身汨其志哉

與提點書

京師交遊慎於高議不同當言之地且溫習文字清心潔行以自樹立平生之稱當見大節不必竊論曲直取小名招大悔矣

與直講三哥書

僕觀大過之象患守常經九四以陽處陰越位救時則王室有棟隆之吉九三以陽處陽固位安時則天下有

棟撓之凶非如艮止之時思不出位者也吾儒之職去
先王之經則茫乎無從矣又豈暇學人之巧失其故步
但惟精惟一死生以之

與胡安定屯田書

老夫平生屢經風波惟能忍窮故得免禍

家書

士之進退多言命運而不言行業明君在上固當使人
以行業而進而乃言命運者是善惡不辨而歸諸天也
豈國家之美事哉臣請察其履行無惡藝業及等者方
得解薦則國家得人百姓受賜

答手詔條陳

嗟夫子嘗求古仁人之心或異二者之爲何哉不以物

喜不以己悲居廟堂之高則憂其民處江湖之遠則憂其君是進亦憂退亦憂然則何時而樂耶其必曰先天下之憂而憂後天下之樂而樂歟噫微斯人吾誰與歸

岳陽樓記

顏魯公唐朝第一等人而餽粥不繼非所謂君子固窮者歟

跋乞米帖

孔子門人七十子之徒天下皆知其賢者或爲邑宰或爲家臣或不願仕蓋顯於諸侯者寡矣然則七十子之徒與孔子語而未嘗及怨何哉君子之道充乎己加乎

人窮與達外也彼戰國豪士不循聖人之道挾數以進
求行其欲得與失重也吾乃知夫由孔子之道者雖困
窮以死不害其爲賢矣

君子之道恥於弗立立而無所施命也君子之命患於
弗知知而無可奈何天也君其斯人之徒歟

以上張道卿墓誌

四民詩

前王詔多士咸以德爲先道從仁義廣名由忠孝全美
祿報爾功好爵縻爾賢黜陟金鑑下昭昭嫌與妍此道
日以疏善惡何茫然君子不斥怨歸諸命與天術者乘

其隙異端千萬惑天道入指掌神心出胸臆聽幽不聽
明言命不言德學者忽其本仕者浮於職節義爲文言
功名思苟得天下無所勸賞罰幾乎息陰陽有變化其
神固不測禍福有倚伏循環亦無極前聖不敢言小人
爾能憶裨竈方激揚孔子甘寂默六經無光輝反如日
月蝕大道豈復興此弊何時抑末路競馳騁澆風揚羽
翼昔多松柏心今皆桃李色願言造物者迴此天地力
士

聖人作耒耜蒼蒼民乃粒國俗儉且淳人足而家給九

載襄陵禍比戶獨安輯何人變清風驕奢日相襲制度
非唐虞賦斂由呼吸傷哉桑穀人常怨大弦急一夫耕
幾壠游惰如雲集一蠶吐幾絲羅綺如山入太平不自
存荒凶亦何及神農與后稷有靈應爲泣農

先王教百工作爲天下器周旦意不朽刊之考工記嗟
嗟遠聖人制度日以紛窈窕阿房宮萬態橫青雲煒煌
甲乙帳一朝那肯焚秦漢驕心起陳隋益其侈鼓舞天
下風滔滔弗能止可堪佛老徒不取慈儉書竭我百家
產崇爾一室居四海競如此金碧照萬里茅茨帝者榮

今爲庶人恥宜哉老成言欲擺般輪指

工

嘗聞商者云轉貨賴斯民遠近日中合有無天下均上以利吾國下以藩吾身周官有常籍豈云逐末人天意亦何事狼虎生貪秦經界變阡陌吾商悲苦辛四民無常籍茫茫僞與真游者竊吾利惰者亂吾倫淳源一以蕩頽波浩無津可堪富與貴侈態日日新萬里奉綺羅九陌資埃塵窮山無遺寶竭海無遺珍鬼神爲之勞天地爲之貧此弊已千載千載猶因循桑柘不成林荆棘有餘春吾商則何罪君子恥爲鄰上有堯舜主下有周

召臣琴瑟願更張使我歌良辰何日用斯言皇天豈不
仁商

文正義莊規矩

一逐房計口給米每口一升並支白米如支糙米卽臨
時加折二斗支糙米每斗折白八升逐月日支每口白米

一男女五歲以上入數

一女使有兒女在家及十五年年五十歲以上聽給米

一冬衣每口一匹十歲以下五歲以上各半匹

一每房許給奴婢米一口卽不支衣

一有吉凶增減口數畫時上簿

一逐房各置請來歷子一道每月米於掌管人處批請
不得隔跨月分支請處管人亦置簿拘轄簿頭錄諸
房口數爲額掌管人自行破用或探支與人許諸房
覺察勒賠填

一嫁女支錢三十貫再嫁二十貫

原注謂次女

一娶婦與錢二十貫再娶不支

一子弟出宦人每還家待闕守選丁憂或任川廣福建
官留家鄉里者並依諸房例請米絹並吉凶錢數雖

近官實有故留家者亦依此例支給

一逐房喪葬尊上有喪先支一十貫至葬事又支一十貫次長五貫葬事支十貫卑幼十九歲以下喪葬通支十貫十五歲以下支三貫七歲以下及婢僕皆不支

一鄉里外姻親戚如貧窘中非次急難或遇年飢不能度日諸房同共相度端實卽於義田米內量行濟物一所管逐年米斛自皇祐二年十月支給逐月餼糧并冬衣絹約自皇祐三年以後每年一年豐熟椿留二年

之糧若遇凶荒除給餽糧外一切不支或二年糧外有餘均勻支給或又不給卽先凶後吉或凶事同時卽先尊口後卑口如尊卑又同卽以所亡所葬先後支給如支上件餽糧吉凶事外更有羨餘數月不得糴貨樁充三年以上糧儲或慮陳損卽至秋成日方得糴貨回換新米樁管

右仰諸房院依此同共遵守

皇祐二年十月口日資

政殿學士尙書禮部侍郎知杭州事范

押

知開封府襄邑縣范純仁奏切念臣父仲淹先任資